

Taiōraa : Ioane 3 : 1 - 18
Īrava Tuāroi : Ioane 3 : 3

« Ua parau atura letu, na ô atura ia na, Āmene, āmene, e parau atu vau ia òe, ia òre te taata ia fanau faahou ra, e òre o ia e ìte i te Pātireia o te Atua ra. »

El haamanaōraa : Te haamanaō faahouhia atu nei tātou, te feiā taiō veā, mai te peu e, e pahonora a ta tātou i niā i teie uiraa, a faatae noa mai te reira i te Piha Ōhipa a te Veā Porotetani i te Faatereraa a te Ētārētia i te Pū no Pāōfai.

Te tahi manaō tātara i niā i te taiōraa

I roto i teie farereira a i rotopū ia letu e o Nitotemo, te tumu parau matamua no ta rāua tauāparauraa, ua haamauhia ia i niā i te parau no te Pātireia o te Atua. O te hoē teie o te mau tumu parau rarahi i roto i nā ēvāneria hiō-āmui e toru. E te parau ra letu e, no te ìte i teie Pātireia, mea nā roto ia i te tahi fanauraa āpī. Ia hiōhia, i mua i teie huru parauraa, aita o Nitotemo e maramarama ra, e aore ra, te imi ra o ia i te tahi raveā ia horoā ā letu i te tahi mau haamaramarama hau atu i niā i te parau no te fanau-faahou-raa, ia au i te huru manaō e vai ra i roto i terā uiraa i te irava 5 «E aha te taata paari e fanau ai ? E ô faahou anei o ia i roto i te ōpū o tā na metua yahine a fanau mai ai ?»

Te haapapū faahou ra letu e, te raveā no te tomo i te Pātireia o te Atua, ua niuhia ia i niā i te tahi tauraa no te taatoā o te taata, te faaauhia i niā i te tahi fanau-faahou-raa, oia hoi, te haamataraa no te tahi oraraa āpī. Ua tūāti maitai teie manaō i niā i te parau no te tahi tiā-faahou-raa, mai tei ìte atoāhia i te tau no te perofeta o Ētetiera i mua i te peho no te ivi marō. Parau mau, i roto i te pene 2 no teie ēvāneria, te vai atoā ra terā titauraa no te tahi «aau āpī», tei tūāti i niā i te parau no te tamāraa i te hara. Ua riro te pape ei tapaō no taua tamāraa ra. Te ìte ra tātou e, e aita o letu e faahiti nei i te tahi parau o te òre roa e maramaramahia e Nitotemo, i niā ihoā i te parau no te pape-titoraa i roto i te pohe e te tiā-faahou-raa o te Metia, tei

faaauhia i te tahi hopuraa pape no te fanauraa āpī, ia au i teie mau manaō e horoāhia ra e teie Pāpai ēvāneria e loane.

No reira, te fanauraa i roto i te Atua, e aore ra, te fanauraa i roto i te Varua, o te fariiraa ia i te tahi ora o te òre roa e noaa i te manaō o te taata ia faanaho e ia tāōtiā. Nā roto i teie poroi, te hinaaro nei letu nā roto ia Nitotemo i te titau i te taatoā o te nunaa Āti-luta i roto i te auraa no teie parau, o rātou tei haamata i te tahi tere nā niā i te ēā o te faaroo, no te mau tapaō i ravehia e letu i mua ia rātou, e o tā na e titau nei ā ia rātou ia tauri i te oraraa tā rātou i mataro noa, no te fanaō i te tahi oraraa āpī e te maitai. Eere rā no rātou anaē teie parau, no te feiā atoā rā e faaroo e e farii i teie titauraa a te Fatu. Aita rā letu i faaea noa i niā i teie manaō, te parau atoā ra o ia e, te feiā e pahono i teie titauraa, e hohoā rātou no te feiā tei arataihia e te aho ora no te Varua o te Atua, no te rave i te mau tapura ōhipa tei faaauhia nā rātou, ia ìte papū atoā rātou i te mau ōhipa o te rai, ta te Tamaiti a te taata i haere mai e faaite. O ia teie e tiā nei ei arai i rotopū i te rai e te fenua, e tei ia na anaē te mana no te heheu mai i te taata i te auraa no te mau ōhipa o te rai e tō te fenua atoā. O ia atoā hoi teie e faaauhia nei i te ōfi tei faateiteihia i te metepara, no te faaite i te upootiāraa o te Atua i niā i te mau ōfi atoā e aratai nei i te taata i roto i te pohe. Te feiā atoā e hiō i taua ōfi ra, e noaa ia rātou te ora ta te Atua e horoā nei i te taata. E parau teie tei tātara-hope-roa i te parau no to letu faateiteiraahia

i niā i te tatauro, no te faaora i te taata i te mau mea atoā e faaiti ra ia na.

Te uiraa i niā i te irava

Uiraa : E aha ta te fanau-faahou-raa e titau ra i te mau maru-metia no teie tau ?

Te tahi pahonora e te tahi tatararaa i niā i te uiraa no tā tātou tūaroi n° 4 Īrava Tūaroi : Mataio 28 : 18 - 20

« Ua haafatata maira letu, na ô maira ia rātou : O te mana atoā i te rai e te ao atoā nei ua pūpūhia mai tei ia ū anaē. E teie nei, e haere outou e faariro i te mau fenua atoā ei pipi, a papetito atu ai ia rātou i roto i te iōa o te Metua, e no te Tamaiti, e no te Varua Maitai : ma te haapii atu ia rātou i te haapaō i te mau mea atoā ta ū i parau atu ia outou na ; e inahā, tei pihai atoā iho ia vau ia outou, e tae noa atu i te hopeā o teie nei ao »

Uiraa : E aha te poroi ta teie nei tonoraa e titau ra i te mau maru-metia no teie tau.

Pahonora : Ia riro te Toru Tahi ei pāpā no tā rātou faaiteraa.

Tatararaa

I roto i teie tonoraa tā te Fatu tei tiāfaahou e faanaho nei no tō na mau hoa rave ōhipa, aita atu e poroiraa rahi tā na e horoā nei ia rātou, māoti ia haamauhia te taatoā no tō

rātou oraraa, tō rātou tiāturi-raa, tā rātou ōhipa e tā rātou faaiteraa i niā i te pāpā no te Toru Tahi, oia hoi, i niā i te Metua, e te Tamaiti e te Varua Moā, te pāpā āueue òre. No te mea, teie te pāpā i ravehia e te Fatu iho i roto i tō na oraraa, tā na ōhipa, to na tiāturi-raa e ta na faaiteraa i te here e te aroha o te Atua metua. Na vai e vavahi te tahi faanahoraa tei pāpā-hia i niā i te paari e te mana o te Atua manahope ? Eere anei, te tano huru tano ra terā manaō e, nō tātou te Atua ra, nā vai e āro mai ia tātou ? Na vai e vavahi te oraraa o te tahi nunaa tei uruāi i to na oraraa i niā i te Atua. Eere anei te riro ra teie parau no tātou, mai te tahi manaō tei horoā faahou i te itoito i roto i te aau o te taata, no te faahinaaro faahou ai i te Atua e ta na ōpuaraa ora.

E aha te poroi e noaa ia tātou nā roto i teie parau nō te Toru Tahi. E parau rahi roa teie. Eita te reira e hope i roto i teie manaō. Te vahia noa rā o tā tātou e tapeā mai no te faaitoitō e no te tauturu atoā ia tātou, ia ìte tātou e, te Toru Tahi, ua riro te reira ei pāpā no te oraraa o te pipi e no te feiā atoā tei faariro ia rātou ei mauhaa na te Atua i roto i teie nei ao. Eere anei, te riro te hoēraa o te Toru Tahi e hiōraa na te mau maru-metia no teie tau, no ta rātou faaiteraa i te parau ōaōa no te here e te aroha o te Atua. Mai te peu e, ua riro te reira ei pūai no te Fatu i roto i tā na ōhipa, e tiāturi atoā tātou e, o to tātou atoā ia te reira itoito.

Julien Mahaa



Photo : D. Margueron